

疏下賊也○庚子右議政李堦上劄略曰日昨常參掌令申兼濟發刑曹罪人鞠問之啓臺臣若有嚴懲討之意則所當逐日詣臺期即了當而不此之為其心所在誠極叵測兼濟本以清州賊族厚招人疑亟宜罷削其臺職使查事無滯批許之○辛丑禁府邏將昌輝順昌以鳩殺道昌自秋曹移捕廳自捕廳移送王府○以尹惠教為大司諫申宅夏為正言李龜休為掌令趙文命為弘文提學○壬寅憲府申前啓不允○癸卯夜坤方有氣如火光○甲辰以李春躋為承旨柳時模為掌令尹淳為禮曹判書上引見領議政洪致中右議政李堦致中曰順昌之言有曰道昌之妾與朴哥之面縛者傳藥云矣上曰順昌之言曰若承欵則不好云者亦極恠訝矣堦曰方多般鈎問矣○丙午以鄭錫五李濟金尚奎鄭來周為承旨李德壽為副提學○丁未上詣太廟將親行夏禴也○戊申上行祭如儀是日還宮○判府事鄭澔上疏略曰近者偶得伏見前月初判府事臣閔鎮遠登對時筵說一段聖教中有曰鄭判府之疏亦為伸救德修故凶惡之輩固不足道而其中不然者亦頗暗疑之以至戊申之變思其根本則皆有所以然矣臣於是骨駭身青頭粘頸上回思前日茫然不記若隔前生事亟令家人尋理年前章劄草藁則終未見有論及其